

四庫全書

集部

欽定四庫全書

集部

御定全唐詩錄卷

八十九  
九十

詳校官左中允<sub>臣</sub>塘五珠

主事銜<sub>臣</sub>徐以坤覆勘

總校官原任中允<sub>臣</sub>王燕緒

校對官中書<sub>臣</sub>田尹衡

謄錄監生<sub>臣</sub>金拱閭

謄錄監生<sub>臣</sub>鍾浩

欽定四庫全書

御定全唐詩錄卷八十九

杜荀鶴

荀鶴字彥之池州人有詩名自號九華山人大順  
中登進士第歸客田頴宣州頴遣至汴通好梁祖  
厚遇之表為翰林學士主客員外郎侮易縉紳人  
咸恨之自編唐風集十卷

近體詩

春宮怨

早被嬋娟誤欲妝  
臨鏡慵承恩不在貌  
教妾若為容  
風暖鳥聲碎日高花影重  
年年越溪女相憶採芙蓉

苦吟

世間何事好最好莫過詩  
一句我自得四方人已知  
生應無輟日死是不吟時  
始擬歸山去林泉道在茲

秋夜晚泊

一望一蒼然蕭騷起暮天  
遠山橫落日歸鳥度平川  
家

是去秋別月當今夕圓漁翁似相伴徹曉葦叢邊

登天台寺

一到天台寺高低景旋生共僧巖上坐見客海邊行野  
色人耕破山根浪打鳴忙時向閒處不覺有閒情

訪道者不遇

寂寂白雲門尋真不遇真祇應松上鶴便是洞中人藥  
圃花香異沙泉鹿跡新題詩留姓氏他日此相親

溪居叟

溪翁居靜處溪鳥入門飛蚤起釣魚去夜深乘月歸見  
君無事老覺我有求非不說風霜苦三冬一草衣

寄益陽武灌明府

縣稱詩人理無嫌日寂寥溪山入城郭戶口半漁樵月  
滿彈琴夜花香漉酒朝相思不相見雲水路迢迢

秋日山中寄李處士

吾輩道何窮寒山細雨中兒童書懶讀果栗樹將空言  
論關時務篇章見國風昇平猶可用應不廢為公

送陳昉歸麻川

麻川清見底似入武陵溪兩岸山相向  
三春鳥亂啼酒旗和柳動僧屋與雲齊  
即此吾鄉路懷君夢不迷

送友遊吳越

去越從吳過吳疆與越連有園多種橘  
無水不生蓮夜市橋邊火春風寺外船  
此中偏重客君去必經年

送人遊吳

君到姑蘇見人家盡枕河古宮閒地少  
水港小橋多夜

市賣菱藕春船載綺羅遙知未眠月鄉思在漁歌

送友人遊南海

南海南邊路君遊祇為貧山川多少地郡邑幾何人  
花鳥名皆別寒暄氣不均相期早晚見莫待瘴侵人

亂後山居

亂後移家擬傍山今來方辦買山錢九州有路休為客  
百歲無愁即是仙野叟並田鋤暮雨溪禽同石立寒烟  
他人似我還應少如此安貧亦荷天



旅中卧病

秋來誰料病相縈枕上心猶算去程風射破窗燈易滅  
月穿疎屋夢難成故園何啻三千里新雁纔聞一兩聲  
我自與人無舊分非干人與我無情

長安道中有作

回頭不忍看羸童一路行人我最窮馬足蹇於槐影裏  
釣船拋在月明中帽簷曉滴淋蟬露衫袖時飄卷雁風  
子細尋思底模樣騰騰又過玉關東

長安春感

出京無計住京難，深入東風轉索然。  
滿眼有花寒食下，一家無信楚江邊。  
此時晴景愁於雨，是處鶯聲苦似蟬。  
公道算來終達去，更從今日望明年。

雋陽道中

客路客路何悠悠，蟬聲向背槐花愁。  
爭知百歲不百歲，未合白頭今白頭。  
四五朶山妝雨色，兩三行雁貼雲秋。  
輸他江上垂綸者，祇在船中老便休。

秋日泊浦江

一帆船歇九秋時  
漠漠蘆花拂浪飛  
晚浦更無船並宿  
暮山時見鳥雙歸  
照雲烽火驚離抱  
剪葉風霜逼暑衣  
江月漸明汀露濕  
靜驅吟魄入玄微

秋宿臨江驛

南來北去二三年  
年年去年來兩鬢  
斑舉世盡從愁裏老  
誰人肯向死前閒  
漁舟火影寒歸浦  
驛路鈴聲夜過山  
身事未成歸未得  
聽猿鞭馬入長安

山中寡婦

夫因兵死守蓬茅  
麻苧衣衫鬢髮焦  
桑柘廢來猶納稅  
田園荒盡尚徵苗  
時挑野菜和根煮  
旋斫生柴帶葉燒  
任是深山更深處  
也應無計避征徭

春日山居寄友人

野吟何處最相宜  
春景暄和好入詩  
高下麥苗新雨後  
淺深山色晚晴時  
半巖雲脚風牽斷  
平野花枝鳥踏垂  
倒載干戈是何日  
近來麋鹿欲相隨

# 雪

風攪長空寒骨生先於曉色報窗明江湖不見飛禽影  
巖谷唯聞折竹聲巢穴幾多相似處路歧兼得一般平  
擁袍公子休言冷中有樵夫趺足行

## 和友人見題山居水閣八韻

池閣初成眼豁開眼前霽景屬微才試攀簷果猿先見  
纔把魚竿鶴即來修竹已多猶可種艷花雖少不勞栽  
南昌一榻延徐孺楚國千鍾逼老萊未稱執鞭奔紫陌

金谷園  
唯宜策杖步蒼苔  
籠禽豈是摩霄翼  
潤木元非澗下材  
鑒已每將天作鏡  
陶情常以海為杯  
和君詩句吟聲大  
蟲豸聞之謂蛰雷

春閨怨

朝喜花艷春暮悲花委  
塵不悲花落早悲妾似花身

馬上行

五里復五里去時無住時日  
將家漸遠猶恨馬行遲

溪興

山雨溪風卷釣絲  
瓦甌篷底獨斟時  
醉來睡着無人喚  
流下前灘也不知

溪畔秋思

桑柘窮頭三四家  
挂罾垂釣是生涯  
秋風忽起溪浪白  
零落岸邊蘆荻花

旅懷

蒹葭月冷時聞雁  
楊柳風和日聽鶯  
水涉山行二年客  
就中偏怕雨船聲

閩中秋思

雨勻紫菊叢叢色風弄紅蕉葉葉聲  
北岸是山南畔海  
祇堪圖畫不堪行

孫榮

榮爵里無考

近體詩

贈妓人

綵翠仙衣紅玉膚  
輕盈年在破瓜初  
霞杯醉勸劉郎賭



雲髻慵邀阿母梳，不怕寒侵緣帶寶。  
每憂風舉倩持裾，漫圖西子晨妝樣。  
西子元來未得如。

題北里妓人壁

寒繡衣裳餉阿嬌，新團香獸不禁燒。  
東隣起樣裙腰濶，剩感黃金線幾條。

崔珏

珏字夢之，登大中進士第，由幕府拜秘書郎，為淇縣令，有惠政。官至侍郎，工詩，以賦鴛鴦得名。時因

以為號

古體詩

美人嘗茶行

雲鬟枕落困泥春玉郎為碾瑟瑟塵間教鸚鵡啄窗響  
和嬌扶起濃睡人銀瓶貯浪水一掬松雨聲來乳花熟  
朱唇啜破綠雲時咽入香喉爽紅玉明眸漸開轉秋水  
手撥絲篁醉心起臺前却坐推金箏不語思量夢中事

道林寺

臨湘之濱麓之隅西有松樹東岸無松風千里擺不斷  
竹泉瀉入千僧厨宏梁大棟何足貴山寺難有山泉俱  
四時唯夏不敢入燭龍安敢停斯須遠公池上種何物  
碧羅扇底紅鱗魚香閣朝鳴大法鼓天宮夜轉三乘書  
野花市井栽不着山雞飲啄聲相呼金檻僧迴步步影  
石盆水濺聯聯珠北臨高處日正午舉手欲摸黃金烏  
遙江大船小於葉邛雜樹齊如蔬潭州城郭在何處  
東邊一片青糝糊今來古往人滿地勞生未了歸丘墟

長卿之門久寂寞五言七字誇規模我吟杜詩清入骨  
灌頂何必須醍醐白日不照耒陽縣黃天厄死饑寒軀  
明珠大貝採欲盡蚌蛤空滿赤沙湖今我題詩亦無味  
懷賢覽古成長吁不如興罷過江去已有好月明歸途  
近體詩

和友人鴛鴦之什

翠鬢紅毛舞夕暉水禽情似此禽稀暫分烟島猶回首  
只渡寒塘亦並飛暝霧盡迷珠殿瓦逐梭齊上玉人機

採蓮無限蘭橈女笑指中流羨爾歸

寂寂春塘烟晚時兩心和影共依依溪頭日暖眠沙穩  
渡口風寒浴浪稀翡翠莫誇饒彩飾鷓鴣須羨好毛衣  
蘭深芷密無人見相逐相呼何處歸

舞鶴翔鸞俱別離可憐生死兩相隨紅絲毳落眠汀處  
白雪花成感浪時琴上只聞交頸語窓前空展共飛詩  
何如相見長相對肯羨人間多所思

有贈

莫道妝成斷客腸  
粉胸綿手白蓮香烟分頂上  
三層綠劍截眸中一寸光  
舞勝柳枝腰更軟歌嫌珠貫曲猶長  
雖然不似王孫女解愛臨邛賣賦郎

錦里芬芳少佩蘭風流全占似君難  
心迷曉夢牕猶暗粉落香肌汗未乾  
兩臉天桃從鏡發一眸春水照人寒  
自嗟此地非吾土不得如花歲歲看

和人聽飲

氣吐幽蘭出洞房  
樂人先問調宮商  
聲和細管珠纔轉

曲度沈烟雪更香公子不隨腸萬結離人須落淚千行  
巫山唱罷行雲過猶自微塵舞画梁

紅臉初分翠黛愁錦筵歌板拍清秋一樓春雪和塵落  
午夜寒泉帶雨流座上美人心盡死尊前旅客淚難收  
莫辭更送劉郎酒百斛明珠異日酬

岳陽樓晚望

乾坤千里水雲間釣艇如萍去復還樓上北風斜卷席  
湖中西日倒銜山懷沙有恨騷人往鼓瑟無聲帝子閒

何事黃昏尚凝睇數行烟樹接荆蠻

李頻

頻字德新睦州人少秀悟多所記覽與里人方干  
善嘗以詩走謁姚少監合丐其品藻合大加獎挹  
以女妻之大中八年登進士第歷秘書郎南陵尉  
武功令拜侍御史乾符中歷都官員外郎建州刺  
史

品彙云頻治建以禮法化下更布教條建賴以安



州人為立祠  
黎山歲祀之  
至宋錫王封

近體詩

山居

欲出窮吾道  
東西自未能  
捲書唯對鶴  
開畫獨留僧  
落葉和雲掃  
秋山共月登  
何年石上水  
夜夜滴高層

秦原早望

一忝鄉書薦  
長安未得回  
年光逐渭水  
春色上秦臺  
燕掠平蕪去  
人衝細雨來  
東風生故里  
又過幾花開

過巫峽

擁棹向驚湍，巫峯直上看。  
削成從水底，聳出在雲端。  
暮雨晴時少，啼猿渴下難。  
一聞神女去，風竹掃空壇。

越中行

越國臨滄海，芳洲暮復晴。  
湖通諸浦白，日隱亂峯明。  
野宿多無定，閒遊免有情。  
天台聞不遠，終到石橋行。

夏日題盤屋友人書齋

修竹齊高樹，書齋竹樹中。  
四時無夏日，三伏有秋風。  
黑

處巢幽鳥陰來叫候蟲牕西太白雪萬仞在遙空

贈立規上人

竹向空齋合無僧在四隣去雲離坐石斜月到禪身樹  
老風終夜山寒雪見春不知諸祖後傳印是何人

送僧入天台

一錫隨緣赴天台又去登長亭舊別路落日獨行僧夜  
燒山何處秋帆浪幾層他時授巾拂莫道老無能

陝州題河上亭

岸擁洪流急亭開清興長  
當軒河草晚入坐水風涼  
獨鳥驚來客孤雲觸去檣  
秋聲和遠雨暮色帶微陽  
浪靜澄窗影沙明發簾光  
逍遙每盡日誰識愛滄浪

苑中題友人林亭

林邑藏巖洞幽棲趣若何  
春篁兼笋密夏鳥雜雛多  
坐有清風起林無暑氣過  
亂書還就葉真飲不聽歌  
片景明紅蘚斜陰映綠蘿  
雄文終不惜莫便棄高科

樂遊原春望

五陵佳氣晚氤氲霸業雄圖勢自分秦地山河連紫塞  
漢家宮殿入青雲未央樹色春中見長樂鐘聲月下聞  
無那楊花起愁思滿天飄落雪紛紛

題張司馬別墅

庭前樹盡手中栽先後花分幾番開巢鳥戀雛驚不起  
野人思酒去還來自拋官與青山近誰訝身為白髮催  
門外尋常行樂處重重履迹在莓苔

湖口送友人

中流欲暮見湘煙  
葦岼無窮接楚天  
去雁遠衝雲夢雪  
離人獨上洞庭船  
風波盡日依山轉  
星漢通宵向水連  
零落梅花過殘臘  
故園歸去又新年

嵩山夜還

家住東臯下  
好採舊山薇  
自省遊泉石  
何曾不夜歸

渡漢江

嶺外音書絕  
經年復歷春  
近鄉情更怯  
不敢問來人

聞金吾妓唱梁州

聞君一曲古梁州驚起黃雲塞上愁秦女樹前花正發  
北風吹落滿城秋

陳陶

陶字嵩伯嶺南人

通考及品彙云鄱陽人馬令陸務觀南唐書並云嶺南也大

中時遊學長安善天文歷數其歌詩常負神仙之  
術或露王霸之說晚干南唐不合隱居洪州鹵山  
種柑橙令山童賣之自給妻子亦知讀書自號三  
教布衣以修鍊為事後不知所終

貫休書西人陳陶處士隱居云有叟傲堯日髮白  
肌膚紅妻子亦讀書種蘭清溪東白雲有奇色紫  
桂含天風即應迎鶴書肯羨於洞洪又云高步前  
山前高歌北山北數載賣柑橙山資近又足

古體詩

懷仙噓

丹陵五牙客昨日羅浮歸赤斧尋不得煙霞空滿衣試  
於華陽問果遇三茅知採藥向十洲同行牧羊兒十洲



隔八海浩渺不可期空留雙白鶴巢在長松枝

雲溪古流水春晚桃花香憶與我師別片帆歸滄浪滄  
浪在何許相思淚如雨黃鶴不復來雲深別離處石渠  
泉泠泠三見菖蒲生日夜勞夢魂隨波注東溟空懷別  
時惠長讀消魔經

避世翁

海上一蓑笠終年垂釣絲滄洲有深意冠蓋何由知直  
鉤不營魚蝸室無妻兒渴飲寒泉水饑食紫靈芝鶴髮

披兩肩高懷如澄陂嘗聞仙老言云是古鷓夷石竇閔  
雷雨金潭養蛟螭乘槎上玉津騎鹿遊峨嵋以人為語  
默與世為雄雌茲焉乃磻溪豹變應須時自古隱淪客  
無非王者師

旅次銅山途中先寄溫州韓使君

亂山滄海曲中有橫陽道東馬過銅梁苔華坐堪老鳩  
鳴高崖裂熊鬬深樹倒絕壑無坤維重林失蒼昊躋攀  
寡儔侶扶接念興阜俛仰慄嵌空無因投靈草梯窮聞

戍鼓魂續賴丘禱敞豁天地歸紫紆村落好悠悠思將  
徑擾擾愧商皓馳想永嘉侯應傷此懷抱

關山月

昔年嫖姚護羌月今見嫖姚雙鬢雪青塚曾無尺寸歸  
錦書多寄窮荒骨百戰金瘡體沙磧鄉心一片懸秋碧  
漢地應啼破鏡時塞塵萬里嬋娟隔度磧衝雲朔風起  
邊笳欲曉生青珥隴上橫吹雪色刀何年斷得匈奴臂

空城雀

古城濛濛花覆水昔日佳人今住鬼野雀荒臺遺子孫  
千年飲啄枯桑根不隨海燕柏梁去應無玉環銜報恩  
近村紅粟香壓枝嗷嗷黃口訴朝饑生來未見鳳凰語  
欲飛常怕蜘蛛絲斷腸四隅天四絕清泉綠蒿無恐疑  
近體詩

朝元引

帝燭熒煌下九天蓬萊宮曉玉爐烟無窮鸞鳳隨金母  
來賀薰風一萬年

玉殿雲開露冕旒  
下方珠翠壓鰲頭  
天雞唱罷南山曙  
春色先歸十二樓

萬寓靈祥擁帝居  
東華元老薦屠蘇  
龍池遙望非煙拜  
五色瞳矐在玉壺

寶祚河宮一向清  
龜魚天篆益分明  
近臣欲獻登封草  
五嶽齊呼萬歲聲

水調詞

水閣簾開燕引雛  
朝朝攀折望金吾  
聞道磧西春不到

花時還憶故園無

長夜孤眠倦錦衾秦樓霜月苦邊心  
征人一倍裝綿厚  
猶慮交河雪凍深

閒居雜興

一顧成周力有餘白雲間釣五溪魚  
中原莫道無麟鳳  
自是皇家結網疎

長愛真人王子喬五松山月伴吹簫  
從他浮世悲生死  
獨駕蒼麟入九霄

答蓮花妓

近來詩思清於水老大心情薄似雲已向昇天得門戶

錦衾深愧卓文君

麗情集云嚴尚書宇鎮豫章以陶操行清潔欲挽之遣小妓號蓮花者往

侍焉陶殊不採妓為詩求去云蓮花為號玉為腮珍重尚書遣妾來處士不生巫峽夢虛勞神女下陽臺陶答之云云後人移其事為陳國南非也

李咸用

咸用唐末人與來鵬范攄同時工詩不第嘗應辟為推官有披沙集六卷藝文志有八世孫台州守

名兼者居宛陵出家藏本請楊廷秀序而行之始  
顯

序略曰推官公詩如見後却無語別來長獨愁如  
危城三面水古樹一邊春如春雨有五色灑來花  
旋成如未醉已知醒後憶欲開先為落時愁讀之  
使人發融冶之歡於荒寒無聊之中動慘戚之感  
於笑談方懌之後國風遺音孰謂其果絃絕

古體詩



塘上行

橫塘日澹秋雲隔，浪織輕飈羅幕幕。  
紅綃撇水蕩舟人，畫橈摻摻柔荑白。  
鯉魚虛擲無消息，花老蓮疎愁未摘。  
却把金釵打綠荷，懊惱露珠穿不得。

江南曲

江南四月薰風低，江南女兒芳步齊。  
晚雲接水共渺瀰，遠沙疊草空萋萋。  
白苧不堪論古意，數花猶可醉前溪。  
孤舟有客歸未得，鄉夢欲成山鳥啼。

水仙操

大沙相拍流水鳴蓬山鳥獸多奇形琴心不喜亦不驚  
安絃緩爪何泠泠水僊縹緲來相迎伯牙從此留嘉名  
嶧陽散木虛且輕重華谷下知其聲縈絲相糾成淒清  
調和引得薰風生指底先王長養情曲終天下稱太平  
後人好事傳其曲有時聲足意不足始戔戔兮復洋洋  
但見山清蕪水綠成連入海移人情豈是本來無嗜慾  
琴兮琴兮在自然不在徽金將軫玉

小松歌

幽人不喜凡草生  
秋鋤劇得寒青青  
庭間土瘦根脚癯  
風搖雨拂精神醒  
短影月斜不滿尺  
清聲細入鳴蛩夕  
天人戲剪蒼龍髯  
參差簇在瑤堦側  
金精水鬼欺不得  
長與東皇逞顏色  
勁節暫因君子移  
貞心不為麻中直  
近體詩

山居

草堂書一架  
苔徑竹千竿  
難世投誰是  
清貧且自安  
隣

居皆學稼客至亦無官焦尾何人聽良宵對月彈

春日

浩蕩東風裏徘徊無所親危城三面水古樹一邊春  
衰世難修道花時不稱貧滔滔天下者何處問通津

登樓值雨

共訝高樓望匡廬色已空白雲橫野濶遮岳與天同  
數點雨入酒滿襟香在風遠江吟得出方下郡齋東

秋日訪同人

忽憶金蘭友攜琴去自由遠尋寒澗碧深入亂山秋見  
後却無語別來長獨愁幸逢三五夕露坐對冥搜

訪友人不遇

出門無至友動即到君家空掩一庭竹去看何寺花短  
僮應捧杖稚女學擎茶吟罷留題處苔階日影斜

冬夕喜友生至

天涯行欲遍此夜故人情鄉國別來久干戈還未平燈  
殘偏有焰雪甚却無聲多少新聞見應須語到明

送邊將

天驕頻犯塞鐵騎又征西  
臣節輕鄉土雄心生鼓鼙  
地寒花不艷沙遠日難低  
漸喜秋弓健鵬翻白草齊

送從兄坤載

忍淚不敢下恐兄情更傷  
別離當亂世骨肉在他鄉  
語盡意不盡路長愁更長  
那堪回首處殘照滿衣裳

送錢契明尊師歸廬山

瘦倚青竹杖鑪峯拍欲歸  
霜粘行日屨風暖到時衣  
凭

檻雲還在攀松鶴不飛何曾有別恨楊柳自依依

聞泉

浙浙夢初驚幽窗枕簟清更無人共聽祇有月空明急  
想穿巖曲低應過石平欲將琴強寫不是自然聲

和吳處士題村叟壁

因閱鄉居景歸心寸火燃吾家依碧嶂小檻枕清川遠  
雨籠孤戍斜陽隔斷煙沙虛遺虎跡水伏聚蛟涎糲麴  
芟汀蓼甘荼挈石泉霜朝巡栗樹風夜探魚船戲日魚

呈腹翹灘鷺並肩碁尋盤石淨酒傍野花妍器以鋤為  
利家惟竹直錢飯香同豆熟湯暖摘松煎睡島鳧藏足  
攀藤欬凍拳淺茅鳴鬪雉曲枅嘯寒鳶秋果楮梨澀晨  
羞笋蕨鮮衣簑留冷閣席草種間田椎髻擔舖餉龐眉  
識稔年嚇鷹芻戴笠驅犢篠充鞭不重官於社常尊食  
作天谷深青藹蔽峯迴白雲纏每憶闕魂夢長誇表愛  
憐覽君書壁句誘我率成篇

謝友生遺端溪硯瓦



尋常濡翰次恨不到端溪得自新知己如逢舊解攜翫  
餘輕照乘謝欲等懸黎靜對勝凡客閒窺憶好題媧天  
補剩石昆劒切來泥著指痕猶濕停旬水未低呵雲潤  
柱礎筆彩飲虹霓鵠眼工諳謬羊肝士乍刳連漸光比  
鏡囚墨膩於磬書信成池黑吟須到日西正誇憂盜竊  
將隱怯攀躋捧受同交印矜持過秉珪草顛終近旭嬾  
癖必無嵇用合緣鸚鵡珍應負會稽貞姿還落落寒韻  
或淒淒風月情相半煙花思豈迷宜從方袋挈枉把短

行批淺小金為斗泓澄玉作隄遇人依我惜想爾與天

齊

闕

行時祇獨齋

題王處士山居

雲木沉沉夏亦寒此中幽隱幾經年無多別業供王稅  
大半生涯在釣船蜀魄叫迴芳草色鷺鷥飛破夕陽烟  
干戈蝟起能高卧只箇逍遙是謫仙

依韻修睦上人山居

春風春雨一何頻望極空江覺損神鶯有來由重入谷

柳無情緒強依人漢庭謁者休言事魯國諸生莫問津  
賴是水鄉檣櫟賤滿爐紅焰且相親

和友人喜相遇

麻衣未識帝城塵四十為儒是病身有恨不關銜國恥  
無愁直為倚家貧齊輕東海二高士漢重商山四老人  
一種愛閒閒不得混時行止却應真

不傍江煙訪所思更應無處展愁睂數杯竹閣花殘酒  
一局松窗日午碁多病却疑天與便自愚潛喜衆相欺

非窮非達非高尚冷笑行藏祇獨知

湘浦有懷

鴻雁哀哀背朔方餘霞倒影畫瀟湘  
長汀細草愁春浪古渡寒花倚夕陽  
鬼樹夜分千炬火漁舟朝卷一篷霜  
儂家本是持竿者為愛明時入帝鄉

緋桃花

茫茫天意為誰留深染天桃備勝遊  
未醉已知醒後憶欲開先為落時愁  
癡蛾亂撲燈難滅躍鯉傍驚電不收

何事梨花空似雪也稱春色是悠悠

李山甫

山甫字里未詳咸通中數舉進士被黜依魏博樂  
彥禎幕府樂禍且怨中朝大臣導彥禎子從訓伏  
兵殺王鐸劫其家嘗有詩云勸君莫用誇頭角夢  
裏輸贏總未真譏執政也巢寇之亂翰林待詔王  
敬邀者北遊在鄴山甫遇於道觀謂曰幽蘭綠水  
可得聞乎邀應命奏之曲終潛然曰憶在咸通玉

亭秋水供奉至尊不意流離至此也山甫賦詩曰  
幽蘭綠水耿清音歎惜先生枉用心世上幾時曾  
好古人前何必獨霑襟句未成山甫亦自黯然悲  
其不遇也

近體詩

寒食

柳帶東風一向斜春陰澹澹蔽人家有時三點兩點雨  
到處十枝五枝花萬井樓臺疑繡畫九原珠翠似烟霞

年年今日誰相問獨卧長安泣歲華

風煙放蕩花披猖鞦韆女兒飛出墻繡袍馳馬拾遺翠  
錦袖鬪雞喧廣場天地氣和融霽色池臺日暖燒春光  
自憐塵土無他事空脫荷衣泥醉鄉

曲江

江色沈天萬草齊暖烟晴靄自相迷蜂憐杏蘂細香落  
鶯墜柳條濃翠低千隊國娥輕似雪一羣公子醉如泥  
斜陽怪得長安動陌上分飛萬馬蹄

兵後尋邊

千里煙砂盡日昏  
戰餘燒罷閉重門  
新成劍戟皆農器  
舊着衣裳盡血痕  
卷地朔風吹白骨  
挂天青氣泣幽魂  
自憐長策無人問  
羞戴儒冠傍塞垣

隋堤柳

曾傍龍舟拂翠華  
至今凝恨倚天涯  
但經春色還秋色  
不覺楊家是李家  
背日古陰從北朽  
逐波疎影向南斜  
年年只有晴風便  
遙為雷塘送雪花



陰地關崇徽公主手跡

一拓纖痕更不收  
翠微蒼蘚幾經秋  
誰陳帝子和番策  
我是男兒為國羞  
寒雨洗來香已盡  
澹烟籠著悵長留

可憐汾水知人意  
旁與吞聲未忍休

廣川書跋云初僕固懷恩之叛其女

沒入宮大歷四年回紇請婚因封為崇徽公主降可汗道汾州以手掌托石壁遂有手痕今靈石有崇徽公主

手痕碑

方干隱居

咬咬嘎嘎水禽聲  
露洗松陰滿院清  
溪畔印沙多鶴跡

檻前題竹有僧名問人遠岫千重意對客閒雲一片情  
早晚塵埃得休去且將琴劍事先生

贈彈琴李處士

情知此事少知音自是先生枉用心世上幾時曾好古  
人前何必更沾襟致身不似笙簧巧悅耳寧如鄭衛淫  
三尺焦桐七條線子期師曠兩沈沈

公子家

曾是皇家幾世侯入雲高第照神州柳遮門戶橫金鎖

花擁絃歌咽畫樓錦袖妒姬爭巧笑玉銜嬌馬索閒遊  
麻衣酷厭平生業醉倚春風不點頭

柳底花陰壓露塵醉煙輕罩一團春鴛鴦占水能嗔客  
鸚鵡嫌籠解罵人腰裏似龍隨日換輕盈如燕逐年新  
不知買盡長安笑活得蒼生幾戶貧

貧女

平生不識繡衣裳閒把荆簪並自傷鏡裏祇應諳素貌  
人間多自重紅妝當年未嫁還憂老終日求媒即道狂

兩意定知無說處暗垂珠淚滴蠶筐

牡丹

邀勒春風不蚤開衆芳飄後上樓臺數苞仙艷火中出

一片異香天上來曉露精神妖欲動暮烟情態恨成堆

知君也解相輕薄斜凭闌干首重迴

司空表聖有絕句云芙蓉驂客空留

怨芍藥詩家只寄情誰似天才李山甫牡丹屬思亦縱橫蓋指此詩也

柳

只為遮樓又拂橋被人摧折好枝條假饒張緒如今在

須把風流暗裏銷

弱帶低垂可自由  
傍他門戶倚他樓  
金風不解相擡舉  
露壓烟欺直到秋

終日堂前學畫眉  
幾人曾道勝花枝  
試看三月春殘後  
門外青陰是阿誰

也曾飛絮謝家庭  
從此風流別有名  
不是向人無用處  
一枝愁殺別離情

御定全唐詩錄卷八十九

欽定四庫全書

御定全唐詩錄卷九十

方干

千字雄飛新定人

干父名肅工詩母即詩人章八元女新定即今嚴郡浙乘云干

桐廬人

徐凝一見器之授以詩律為人質野喜凌侮

每見人設三拜曰禮數有三識之者呼為方三拜  
貌寢又鬼缺有司以故不與科名隱會稽之鏡湖  
及遇醫補唇已老矣因終身不出嘗謁姚合合意

侮之覽詩卷為變容敬禮列郡湖州鄭仁規建州  
李頻九江陶祥並於干契分為深初會稽守王龜  
欲薦干諫署不果歿後宰臣張文蔚奏文人不第  
者十五人干預其數追賜及第干律詩鍊句字字  
無失有高堅峻拔之目自咸通得名迄文德江之  
南未有及者後進私諡為元英先生

王贊序曰干之為詩鋟肌滌骨冰瑩霞絢嘉肴自  
將不吮餘雋麗不葩粉苦不棘癰當其得志倏與



神會詞若未至意已獨達先是丹陽有南陽張祜  
差前干生其詩放言橫肆皆吳越之遺逸余嘗較  
之張祜升杜甫之堂方干入錢起之室矣

近體詩

鏡中別業

寒山壓鏡心此處是家林梁燕窺春醉岳猿學夜吟雲  
連平地起月向白波沉猶自聞鐘角棲身可在深

世人如不容吾自縱天慵落葉憑風掃香衿倩水春花

朝連郭霧雪夜隔湖鐘身外能無事頭宜白此峯

山中即事

趨世非身事山中適性情野花多異色幽鳥少凡聲樹  
影搜涼卧苔光破碧行閒尋採藥處仙路漸分明

過黃州作

弭節齊安郡孤城百戰殘傍村林有虎帶郭縣無官暮  
角梅花怨清江桂影寒黍離緣底事撩我起長嘆

冬夜泊僧舍

江東寒近臘野寺水天昏無酒能消夜隨僧早閉門照  
牆燈焰細著瓦雨聲繁漂泊仍千里清吟欲斷魂

東溪別業寄段郎中

前山含遠翠羅列在窓中盡日無人到一樽誰與同涼  
隨蓮葉雨暑避柳條風豈分長岑寂明時有至公

寄石湓清越上人

寺處唯高僻雲生石枕前靜吟因得句獨夜不妨禪牕  
接停猿樹岳飛洗鶴泉相思有書札俱倩獵人傳

送姚合負外赴金州

受詔從華省開旗發帝州  
野烟新驛曙殘照古山秋  
樹勢連巴沒江聲入楚流  
唯應化行後吟句上閒樓

經周處士故居

愁吟與獨行何事不傷情  
久立釣魚處唯聞啼鳥聲  
山蔬和草嫩海樹入籬生  
吾在茲溪上懷君恨不平

過朱協律故山

地下無餘恨人間得盛名  
殘篇續大雅稚子托諸生  
度

日山空暮綠溪鶴自鳴難收故交意寒笛一聲聲

山中言事

日與村家事漸同燒松吸茗學鄰翁池塘月撼芙蓉浪  
牕戶涼生薜荔風晝幌晝昏嵐氣裏巢枝夜折雪聲中  
山陰釣叟無知己窺鏡捋多鬢欲空

欹枕亦吟行亦醉卧吟行醉更何營貧來猶有故琴在  
老去不過新髮生山鳥踏枝紅果落家僮引釣白魚驚  
潛夫自有孤雲侶可要王侯知姓名

鑑湖西島言事

慵拙幸便荒僻地縱聽猿鳥亦何愁  
偶斟藥酒欺梅雨却著寒衣過麥秋  
歲計有時添橡實生涯一半在漁舟  
世人若便無知己應向北溪成白頭

初歸鏡中寄陳端公

去歲離家今歲歸孤帆夢向鳥前飛  
必知蘆笋侵沙井兼被藤花占石磯  
雲島採茶常失路雪龕中酒不關扉  
故交若問逍遙事玄冕何曾勝葦衣

湖北有茅齋湖西有松島輕棹往返頗諧素心因

成四韻

湖北湖西往復還朝昏只處自由間暑天移榻就深竹  
月夜乘舟歸淺山遶砌紫鱗歌枕釣垂簷野果隔窗攀  
古賢暮齒方如此多笑愚儒鬢未斑

自縉雲赴郡溪流百里輕棹一發曾不崇朝叙事  
四韻寄獻段郎中

激箭溪湍勢莫憑飄然一葉若為乘仰瞻青壁開天罅

斗轉寒灣避石稜巢鳥夜驚離島樹啼猿書怯下嵬藤  
此中明日尋知己恐似龍門不易登

路入剡中作

截灣衝瀨片帆通高枕微吟到剡中掠草並飛憐燕子  
停橈獨飲學漁翁波濤漫撼長潭月楊柳斜穿一岼風  
便擬乘槎應去得仙源直恐接星東

睦州呂郎中郡中環溪亭

為是仙才登望處風光是武陵春閒花半落猶迷蝶



白鳥雙飛不避人樹影興餘侵枕簟荷香坐久著衣巾  
暫來此地非多日明主那容借寇恂

題睦州郡中千峰榭

豈知平地似天台朱戶深沈別徑開曳響露蟬穿樹去  
斜行沙鳥向池來窗中早月當琴榻牆上秋山入酒盃  
何事此中如世外應緣羊祜是仙才

再題路支使南亭

行處避松兼礙石即須門徑落斜開愛邀舊友看漁釣

貪聽新禽駐酒杯  
樹影不隨明月去  
溪聲常送落花來  
睡時分得江淹夢  
五色毫端弄逸才

題越州袁秀才林亭

清邃林亭指畫開  
幽巖別派像天台  
坐牽蕉葉題詩句  
醉觸藤花落酒杯  
白鳥不歸山裏去  
紅鱗多自鏡中來  
終年此地為吟侶  
早起尋君薄暮回

題桐廬謝逸人江居

清世高眠無一事  
五侯勲盛欲如何  
湖邊倚杖寒吟苦

石上橫琴夜醉多，鳥自樹梢隨果落。  
人從牕外卸帆過，由來朝市為真隱。  
可要棲身向薜蘿。

旅次洋州寓居郝氏林亭

舉目縱然非我有，思量似在故山時。  
鶴盤遠勢投孤嶼，蟬曳殘聲過別枝。  
涼月照窗欹枕倦，澄泉遶石泛觴遲。  
青雲未得平行去，夢到江南身旅羈。

題法華寺絕頂禪家壁

蒼翠岩堯逼窅冥，下方雷雨上方晴。  
飛流便向砌邊挂，

片月影從窗外行  
馴鹿不知誰結侶  
野禽多是自呼名  
只應禪者無來去  
坐看千山白髮生

書法華寺上方禪壁

砌下松顛有鶴棲  
孤猿亦在鶴邊啼  
卧聞雷雨歸巖早  
坐見星辰去地低  
一徑穿緣應就郭  
千花掩映似無溪  
是非生死多憂惱  
此日蒙師為破迷

題龍泉寺絕頂

未明先見海底日  
良久遠雞方報晨  
古樹含風長帶雨

寒巖四月始知春中天氣爽星河近下界時豐雷雨勻  
前後登臨思無盡年年改換去來人

題報恩寺上方

客來先上上方看眼界無窮世界寬  
岳溜噴空晴似雨林蘿礙日夏多寒  
衆山迢遞皆相疊一路高低不記盤  
清峭關心惜歸去他時夢到亦難判

題寶林山禪院

山捧亭臺郭遶山遙盤蒼翠到山巔  
岳中古井雖通海

窟裏陰雲不上天羅列衆星依木末周廻萬室在簷前  
我來可要歸禪老一寸寒灰已達禪

題澄聖塔院上方

地靈真是饒雲雨杉檜老於雲雨間只訝窗中常見海  
方知砌下更多山遠泉勢曲猶須引野果枝低可要攀  
若把重門論玄寂何妨善閉却無關

陪王大夫泛湖

去去凌晨廻見星木蘭舟穩画橈輕白波潭上魚龍氣

紅樹林中雞犬聲  
密炬燒殘銀漢晨  
羽觴飛急玉山傾  
此時檢點諸名士  
却是漁翁無姓名

和于中丞登扶風亭

避石攀蘿歸不迷  
行時舉步似丹梯  
東軒海日已先照  
下界晨雞猶未啼  
郭裏雲山全占寺  
村前竹樹半藏溪  
謝公吟望多來此  
此地應將峴首齊

陽亭言事獻漳州于使君

重疊山前對酒罇  
騰騰兀兀度朝昏  
平明疎磬白雲寺

遙夜孤砧紅葉村去鳥豈知烟樹遠驚魚應覺露荷翻  
旅人寄食逢黃菊每見北辰思故園

郊山贈洪拾遺

聖代諫臣停諫舌求歸故里傲雲霞溪頭講樹纜漁艇  
篋裏朝衣輸酒家但愛身閒辭祿俸那嫌歲計在桑麻  
我來幸與諸生異問答時容近絳紗

贈處州段郎中

幸見仙才領郡初郡城孤峭似山居杉蘿色裏遊亭榭



瀑布聲中閱簿書，德重自將天子合情高。  
元與世人疎寒潭，是處清連底。賓席何心望食魚。

贈山陰崔明府

用心何況兩衙間，退食孜孜亦不閒。  
壓酒曬書猶檢點，修琴取藥似交關。  
笙歌入夜舟中月，花木如春縣裏山。  
平叔正堪湯餅試，風流不合問年顏。

賊退後贈劉將軍

非唯吳起與穰苴，今古推排盡不如。  
白馬知無髀上肉。

黃巾泣向箭頭書二年戰地成桑茗千里荒榛作比閭  
功業更多身轉貴佇看幢節引戎車

贈華陰隱者

少微夜夜當仙掌更有何人在此居花月舊應看浴鶴  
松蘿本自伴刪書素琴醉去經宵枕衰髮寒來向日梳  
故國多年歸未遂因逢此地憶吾廬

贈天台葉尊師

莫見平明離少室須知薄暮入天台常時愛縮山川去

有夜自攜星月來靈藥不知何代得古松應是長年栽  
先生暗笑看蒼者半局蒼邊白髮催

送孫百篇遊天台

東南雲路落斜行入樹穿村見赤城遠近常時皆藥氣  
高低無處不泉聲映巖日向牀頭沒濕燭雲從柱底生  
更有仙花與靈鳥恐君多半未知名

送鄭台處士歸絳巖

榮啓先生挾琴去厭尋靈勝憶嵒棲白猿垂樹窗邊月

紅鯉驚鉤竹外溪  
慣採藥苗供野饌  
曾書蕉葉寄新題  
古賢猶愴河梁別  
未可忽忽便解攜

許負外新陽別墅

蘭汀橘島映亭臺  
不是經心即手栽  
滿閣白雲隨雨去  
一池寒月逐潮來  
小松出屋和巢長  
新徑通村避笋開  
柳絮風前欹枕卧  
荷花香裏釣魚回  
園中認葉分靈草  
簷下攀枝落野梅  
莫恣高情求逸思  
須防急詔用長才  
若因螢火終殘卷  
便把漁歌送幾杯  
多謝郢中賢太守

常時譚笑許趨陪

衢州別李秀才

千山紅樹萬山雲把酒相看日又曛  
一曲離歌兩行淚更知何處再逢君

與徐溫話別

去去何時却見君悠悠煙水似天津  
明年今夜有明月不是今年看月人

李昌符

昌符字巖夢有詩名與張喬許棠輩同稱十哲咸  
通四年登進士第歷膳部員外郎

北夢瑣言昌符久不第常歲卷軸怠於裝修因出  
一竒作婢僕詩五十首於公卿間行之浹旬京城  
盛傳是年登第與夫桃杖虛靴事雖不同用竒即  
無異也

近體詩

遠歸別墅

馬首曾行處連嘶渡晚河  
勿驚鄉樹出漸識路人多  
細徑穿禾黍頽垣壓薜蘿  
乍歸猶似客鄰叟亦相過

### 塞上行

朔野烟塵起天軍又舉戈  
陰風向晚急殺氣入秋多  
樹盡禽棲草冰堅路在河  
汾陽無繼者羌部肯相和

### 旅遊傷春

酒醒鄉關遠迢迢聽漏終  
曙分林影外春盡雨聲中  
鳥思鄉村路花殘野岼風  
十年成底事羸馬倦西東

送人出塞

北風吹雨雪舉目已悽悽  
戰鬼秋頻哭征鴻夜不栖  
沙平關路直磧廣郡樓低  
此去非東魯人多事鼓鼙

來鵬

鵬豫章人詩思清麗韋尚書岫愛其才欲以女妻之而不果

近體詩

宛陵送李明府罷任歸江州



菊花村晚鴈來天共把離杯向水邊  
官滿便尋垂釣侶  
家貧已用賣琴錢浪生湓浦千層雪  
雲起爐峯一炷烟  
儻見吾鄉舊知己為言憔悴過年年

清明日與友人遊王粒塘莊

幾宿春山逐陸郎清明時節好風光  
歸穿綠荇船頭滑  
醉踏殘花屐齒香風急嶺雲飄迴野  
雨餘田水落方塘  
不堪吟罷東回首滿耳蛙聲正夕陽

王遵

遵宣城人登咸通七年進士第

撫言云遵與許崇同鄉幼為小吏崇應二十餘舉  
遵猶在胥徒善為絕句詩然深自晦密一旦辭役  
就貢會崇送客至灞澹間遇遵於途訊曰何事至  
京遵曰就貢崇怒曰小吏無禮後遵成名五年崇  
始登第

近體詩

彭澤

鶴愛孤松雲愛山官情微祿免相關栽成五柳吟歸去  
漉酒巾邊伴菊閒

長城

秦築長城比鐵牢蕃戎不敢過臨洮雖然萬里連雲際

爭及堯階三尺高

遵此詩得名於時何光遠以為集中無以加

胡曾

曾邵陽人咸通中舉進士不第嘗為漢南從事有

安定集十卷詠史詩三卷

近體詩

寒食都門作

二年寒食住京華  
寓目春風萬萬家  
金絡馬銜原上草  
玉釵人折路傍花  
軒車竟出紅塵外  
冠蓋爭回白日斜  
誰念都門兩行淚  
故園寥落在長沙

贈薛濤

萬里橋邊女校書  
枇杷花下閉門居  
掃眉才子知多少  
管領春風總不如

渭濱

岸草青青渭水流  
子牙曾此獨垂鈎  
當時未入非熊兆  
幾向斜陽嘆白頭

流沙

七雄戈戟亂如麻  
四海無人得坐家  
老氏却思天竺住  
便將徐甲去流沙

摩笄山

春草綿綿岱日低  
山邊立馬看摩笄  
黃鶯也解追前事

來向夫人死處啼

黃金臺

北乘羸馬到燕然此地何人復禮賢  
欲問昭王無處所黃金臺上草連天

澠池

日照荒城芳草新相如曾此挫強秦  
能令百二山河主便作樽前擊缶人

長平

長平瓦震武安初趙卒俄成戲鼎魚四十萬人俱下世  
元戎何用讀兵書

易水

一旦秦王馬角生燕丹歸此送荆卿行人欲識無窮恨  
聽取東流易水聲

云云亭

一上高亭日正晡青山重疊片雲無萬年松樹不知數  
若箇蚪枝是大夫

居延

漠漠平沙際碧天問人云此是居延停驂一顧猶魂斷  
蘇武爭禁十九年

李陵臺

北入單于萬里疆五千兵敗滯窮荒英雄不伏蠻夸死  
更築高臺望故鄉

渾沱河

光武經營業未興王郎兵革整憑陵須知後漢功臣力



不及滹沱一片冰

銅雀臺

魏武龍興逐逝波  
高臺空按望陵歌  
遏雲聲絕悲風起  
翻向樽前泣翠娥

西園

月滿西園夜未央  
金風不動鄴天涼  
高情公子多秋興  
更領詩人入醉鄉

金谷園

一自佳人墜王樓繁華東逐洛河流惟餘金谷園中樹  
殘日蟬聲送客愁

東山

五馬南浮一化龍謝安入相此山空不知攜妓重來日  
幾樹鶯啼谷口風

武陵溪

一溪春水徹雲根流水桃花片片新若道長生是虛語  
洞中爭得有秦人

金陵

侯景長驅十萬人可憐梁武坐蒙塵生前不得空王力  
徒向金田自捨身

汴水

千里長河一旦開亡隋破浪九天來錦帆未落干戈起  
惆悵龍舟更不迴

唐彥謙

彥謙字茂業晉陽人莒公儉之後博學多藝文詞

壯麗書畫音樂博飲之技無不出於流輩咸通末  
應進士負才無所屈降十餘年不第乾符末避亂  
漢南中和河中王重榮辟為從事累表為副歷  
晉絳二州刺史重榮軍亂貶漢中掾曹節度楊守  
亮復署為判官累表為副歷閬壁二州刺史彥謙  
詩尤工七言少師溫庭筠故體格類之有鹿門集  
彥謙詩學溫李宋楊文公嗜其集手書自隨嘗謂  
其得義山清峭感愴之一體

紀事云彥謙即陶穀之祖穀避晉祖嫌名改姓子孫遂不易

近體詩

上巳寄韓公

上巳接寒食鶯花寥落晨微微  
潑火雨草草踏青人涼似三秋  
景清無九陌塵與余同病者對  
此合傷神

漢代

漢代金為屋吳宮綺作寮  
艷詞傳靜婉新曲定妖嬈  
箭

響猶殘夢籤聲報早朝鮮明臨曉日迴轉度春宵半袖  
籠清鏡前絲壓翠翹靜多如有待閒極似無慘梓澤花  
猶滿靈和柳未凋障昏巫峽雨屏掩浙江潮未信潘名  
岳應疑史姓蕭漏因歌暫斷燈為雨頻挑飲酒闌三雅  
投壺賽百嬌鈿蟬新翅重金鴨舊香焦水淨疑澄練霞  
孤欲建標別隨秦柱促愁為蜀絃么元晏難瘳痺臨叩  
但發痛聯詩徵弱絮思友詠甘蕉王氏憐諸謝周郎定  
小喬黼幃翹綵雉波扇畫文鯨行窳妨垂釣荷欹欲渡

橋不因衣帶水誰覺路迢迢

七夕

露白風清夜向晨小星垂珮月埋輪  
絳河浪淺休相隔  
滄海波深尚作塵  
天外鳳凰何寂寞  
世間烏鵲漫辛勤  
猗蘭殿北斜樓上多少通宵不睡人

文惠宮人

認得前家令宮人淚滿裾  
不知梁佐命全是沈尚書

曲江春望

杏艷桃嬌奪晚霞樂遊無廟有年華漢朝冠蓋皆陵墓  
十里宜春下苑花

仲山

漢高祖兄  
仲葬此

千載遺蹤寄薜蘿沛中鄉里漢山河長陵亦是閒丘隴  
異日誰知與仲多

柳

絆惹春風別有情世間誰敢鬪輕盈楚王江畔無端種  
餓損宮腰學不成



高駢

駢字千里南平郡王崇文之孫家世禁衛折節為  
文學與諸儒交懿宗朝歷秦州經畧安南都護鄆  
州西川荆南節度觀察等使廣明之亂拜諸道兵  
馬都統鎮揚州懷貳心擁兵自固好神仙信任呂  
用之諸人政大亂為其將畢師鐸所殺

太平廣記云駢幼好為詩雅有奇藻屬情賦詠橫  
絕常流時秉筆者多不及之故唐李言勳臣有文

者駢其首焉集遇亂多亡今其存者如言懷二女  
廟咏雪聽歌竹杖多盛傳於世

近體詩

和王昭符進士贈洞庭趙先生

為愛君山景最靈  
角冠秋禮一壇星  
藥將雞犬雲間試  
琴許魚龍月下聽  
自要乘風隨羽客  
誰同種玉驗仙經  
烟霞寂寞無人到  
惟有漁翁過洞庭

步虛詞

清谿道士人不識  
上天下天鶴一隻  
洞門深鎖碧窗寒  
滴露研朱點周易

山亭夏日

綠樹陰濃夏日長  
樓臺倒影入池塘  
水晶簾動微風起  
滿架薔薇一院香

邊方春興

草色青青柳色濃  
玉壺傾酒滿金鍾  
笙歌嘹亮隨風去  
知盡關山第幾重

聞河中王鐸加都統

煉汞燒鉛四十年至今猶在藥爐前  
不知子晉緣何事只學吹簫使得仙

春日招賓

花枝如火酒如飴正好狂歌醉復醒  
對酒看花何處好延和閣下碧筠亭

廣陵宴次戲簡幙賓

一曲狂歌酒百分蛾眉盡出月爭新  
將軍醉罷無餘事

亂把花枝折贈人

渭川秋望寄右軍王特進

長川終日碧潺湲知道天河與地連  
憑寄兩行朝闕淚願隨流入御溝泉

顧雲

雲字垂象池州人風韻詳整與杜荀鶴殷文圭友  
善同肄業九華咸通十五年登進士第為高駢淮南  
從事師鐸之亂退居雲川杜門著書執政薦脩

國史書成加虞部員外郎

北夢瑣言云雲鰲賈之子與羅隱俱受知於令狐相公子弟宴會每預風韻談諧莫辨其為寒素之士

太平廣記大順中詔雲同羊昭業等十人脩史謁高逢休逢休為遺書劉僕射譏諸人擬將一尺三寸汗脚踏他燒殘龍尾道懿宗皇帝雖薄德不任被前件人羅織執大政者亦太悠悠雲私啟其函

吁嗟而已

古體詩

蘇君廳觀韓幹馬障歌

杜甫歌詩吟不足可憐曹霸丹青曲直言弟子韓幹馬  
畫馬無骨但有肉今日披圖見筆跡始知甫也真凡目  
秦王學士居武功六印名家聲價雄乃孫屈跡寧百里  
好奇學古有祖風竹廳斜日奕碁散延我直入書齋中  
屹然六幅古屏上歛見圉人牽入天廐之神龍麟鬐鳳

臆真相似秋竹慘慘披兩耳輕勻杏藥糝皮毛細撫銀  
絲插髻尾思量動步應千里誰見初離渥洼水眼前只  
欠燕雪飛蹄下如聞朔風起朱崖謫掾從亡歿更有何  
人鑒竒物當時若遇燕昭王肯把千金買枯骨

章碣

碣孝標之子登乾符進士第

近體詩

春別



擲下離觴指亂山  
趨程不待鳳笙殘  
花邊馬嚼金銜去  
樓上人垂玉筍看  
柳陌雖然風裊裊  
葱河猶自雪漫漫  
殷勤莫厭貂裘重  
恐犯三邊五月寒

送謝進士歸閩

百越風烟接巨鰲  
還鄉心壯不知勞  
雷霆入地建溪險  
星斗逼人梨嶺高  
却擁木綿吟麗句  
便攀龍眼醉香醪  
名場聲利喧喧在  
莫向林泉改鬢毛

焚書坑

竹帛烟銷帝業虛  
關河空鏢祖龍居  
坑灰未冷山東亂  
劉項原來不讀書

崔塗

塗字禮山光啓進士

近體詩

夕次洛陽道中

秋風吹故城  
城下獨吟行  
高樹鳥已息  
古原人尚耕  
流年川暗度  
往事月空明  
不復嘆岐路  
馬前塵夜生

蜀城春望

天涯憔悴身一望一沾巾  
在處有芳草滿城無故人  
懷材皆得路失計獨傷春  
清鏡不忍照鬢毛應更新

過陶徵君舊居

陶令曾居此弄琴遺世情  
田園三畝綠軒冕一銖輕  
衰柳自無主白雲猶可耕  
不隨陵谷變應只有高名

孤雁

幾行歸塞盡念爾獨何之  
暮雨相呼失寒塘欲下遲  
渚

雲低暗渡關月冷相隨未必逢矰繳孤飛自可疑

春夕旅懷

水流花謝兩無情送盡東風過楚城蝴蝶夢中家萬里  
杜鵑枝上月三更故園書動經年絕華髮春催兩鬢生  
自是不歸歸使得五湖烟景有誰爭

鸚鵡洲春眺

悵望春襟鬱未開重臨鸚鵡益堪哀曲暘尚不能容物  
黃祖何因解愛才幽島暖聞燕雁去曉江晴覺蜀波來

誰人正得風濤便一點輕帆萬里回

讀庾信集

四朝十帝盡風流建業長安兩醉遊  
唯有一篇楊柳曲  
江南江北為君愁

李郢

郢字楚望大中中進士第為藩鎮從事兼侍御史  
古體詩

茶山貢焙歌

使君愛客情無已客在金臺價難比春風三月貢茶時  
盡逐紅旌到山裏焙中清曉朱門開筐箱漸見新芽來  
凌烟觸露不停採官家赤印連帖催朝饑暮飢誰興衰  
喧闐競納不盈掬一時一餉還成堆蒸之馥之香勝梅  
研膏架動轟轟如雷茶成拜表貢天子萬人爭噉春山摧  
驛騎鞭聲聳流電半夜驅夫誰復見十日王程路四千  
到時須及清明宴吾君可謂納諫君諫官不諫何由聞  
九重城裏雖旰食天涯吏役長紛紛使君憂民慘容色

就焙嘗茶坐諸客幾回到口重咨嗟嫩綠鮮芳出何力  
山中有酒亦有歌樂營房戶皆仙家仙家十隊酒百斛  
金絲宴饌隨經過使君是日憂思多客亦無言徵綺羅  
殷勤繞焙復長嘆官府例成期如何吳民吳民莫憔悴  
使君作相期蘇爾

近體詩

即目

自笑騰騰者非慙又不狂何為跼似鼠而復怯於麀落

拓無生計伶俚戀酒鄉  
冥搜得詩窟偶戰出文場  
愛雪愁冬盡懷人覺夜長  
石樓多爽氣檉案有餘香  
運去非關拙時來不在忙  
平生兩閒暇孤趣滿滄浪

春晚題山家

偶與樵人熟春殘日日來  
依岡尋紫蕨挽樹得青梅  
燕靜銜泥起蜂喧抱蕊回  
嫩茶重攬綠新酒畧吹醅  
漠漠蟄生紙涓涓水弄苔  
丁香正堪結留步小庭隈

江亭春霽



江籬漠漠荇田田江上雲亭霽景鮮蜀客帆檣背歸燕  
楚山花木怨啼鶻春風掩映千門柳晚色淒寒萬井烟  
金磬泠泠水南寺上方僧室翠微連

暮春山行田家歇馬

雨濕菰蒲斜日明茅厨煮蠶掉車聲青蛇上竹一種色  
黃蝶隔溪無限情何處樵漁將遠餉故園田土憶春耕  
千峰靄靄水滴滴羸馬此中愁獨行

江亭晚秋

碧天涼冷鴈來疎閒看江雲思有餘秋館池亭荷葉歇  
野人籬落豆花初無愁自得仙翁術多病能忘太史書  
聞說故園香稻熟片帆歸去就鱸魚

送劉谷

村橋西路雪初晴雲暖沙乾馬足輕寒澗渡頭芳草色  
新梅嶺外鷓鴣聲郵亭已送征車發山館誰將候火迎  
落日千峰轉迢遞知君回首望高城

江上逢王將軍

虬鬚憔悴羽林郎曾入甘泉侍武皇  
雕沒夜雲知御苑馬隨春仗識天香  
五湖歸去孤舟月六國平來兩鬢霜  
唯有桓伊江上笛卧吹三弄送殘陽

鄭畋

畋字台文滎陽人會昌進士第美風儀神采如玉  
文學優深尤長於賦

近體詩

謁昇仙太子廟

在昔靈王子吹笙溯沕寥六宮攀不住三島互相招亡  
國原陵古賓天歲月遙無蹊窺海曲有廟訪山椒石帳  
龍蛇拱雲樓彩翠銷露壇裝琬琰真像寫松喬珠館青  
童宴琳宮阿母朝氣輿仙女侍天馬吏兵調湘妓紅絲  
瑟秦郎白琯簫西城邀綽約南嶽命嬌嬈句曲觴金洞  
天台嘯石橋晚花珠弄藥春茹玉生苗二景神光秘三  
元寶籙饒霧垂鴉翅髮冰束虎章腰鶴馭爭銜箭龍妃  
各獻綃衣從星渚浣丹就日宮燒物外花常滿人間葉

自凋望臺悲漢戾闕水笑梁昭古殿香殘地荒堦柳長  
條幾曾期七日無復降重霄嵩嶺烜天漢伊瀾入海潮  
何由得真訣使我珮環飄



御定全唐詩錄卷九十